

# Rapport annual della Romania per 1966

Objekttyp: **Group**

Zeitschrift: **Igl Ischi : organ della Romania (Societat de Students Romontschs)**

Band (Jahr): **52 (1966)**

PDF erstellt am: **09.08.2024**

## **Nutzungsbedingungen**

Die ETH-Bibliothek ist Anbieterin der digitalisierten Zeitschriften. Sie besitzt keine Urheberrechte an den Inhalten der Zeitschriften. Die Rechte liegen in der Regel bei den Herausgebern.

Die auf der Plattform e-periodica veröffentlichten Dokumente stehen für nicht-kommerzielle Zwecke in Lehre und Forschung sowie für die private Nutzung frei zur Verfügung. Einzelne Dateien oder Ausdrucke aus diesem Angebot können zusammen mit diesen Nutzungsbedingungen und den korrekten Herkunftsbezeichnungen weitergegeben werden.

Das Veröffentlichen von Bildern in Print- und Online-Publikationen ist nur mit vorheriger Genehmigung der Rechteinhaber erlaubt. Die systematische Speicherung von Teilen des elektronischen Angebots auf anderen Servern bedarf ebenfalls des schriftlichen Einverständnisses der Rechteinhaber.

## **Haftungsausschluss**

Alle Angaben erfolgen ohne Gewähr für Vollständigkeit oder Richtigkeit. Es wird keine Haftung übernommen für Schäden durch die Verwendung von Informationen aus diesem Online-Angebot oder durch das Fehlen von Informationen. Dies gilt auch für Inhalte Dritter, die über dieses Angebot zugänglich sind.

# RAPPORT ANNUAL DELLA ROMANIA PER 1966

Uonn ein 50 onns vargai dapi la mort dil fundatur della Romania, dr. *Caspar Decurtins*. Ils 16 d'october 1966 ha la ludeivla vischnaunca de Trun commemora quei anniversari cun ina digna festività. Cheutras ha ella regurdau il pievel romontsch alla gronda e nunstunclenteilva lavur dil «liun de Trun» per il moviment romontsch e per l'acziun sociala.

En sia allocaziun festiva ha dr. Giachen Giusep Casaulta, secretari della Ligia Romontscha, fatg menziun dils gronds merets de dr. Caspar Decurtins per la renaschientscha romontscha. La perdetga la pli impressiunonta de sia vasta e fritgeivla lavur sil camp romontsch ei bein la Crestomazia.

Suenter la fundaziun della Romania igl onn 1896 ha Caspar Decurtins redigiu plirs onns igl Ischi, ch'ei medemamein staus sia inspiraziun. Cun quei annuari vuleva el purtar l'activitad romontscha viado el pievel. Siu luvrar e barhar en favur dil lungatg matern e della ovra sociala ed ideala ein motivs sufficientes per mantener el en viva ed attachada memoria.

Duront igl onn 1966 han oravontut duas acziuns fatschentau la suprastanza. L'emprema per-

tucca la midada della structura della Romania. Gia dapi onns eis ei semussau che la Romania stoppi vegnir reorganisada. Ei se tracta en special d'empruar de penetrar cul moviment romontsch el pievel. La suprastanza ha elegiu ina *Cumissiuin de statuts* ed incumbensau quella cun la preparaziun della revisiun. Quella secumpona da 10 commembers che representan differentas organisaziuns culturalas e vegn presidiada da dr. Fidel Caviezel, secretari dil departement de finanzas. Cun l'entschatta digl onn 1967 sa ella entscheiver sia lavur.

Medemamein s'occupescha era la *Secziun studentica* d'ina midada dils statuts. Sia Cumissiuin per la revisiun dils statuts ha intercuretga en ina roscha sedutas igl origin e svilup historic della Romania, examinau la situaziun actuala della Secziun studentica e dau ina egliada el futur. Quei studi — che vegn a vegnir publicaus — fuorma la basa per elaborar il sboz definitiv.

L'autra acziun pli gronda della Romania ei stada la *dieta economica* dils 29/30 d'october 1966 a Breil. Igl ei semussau ch'igl ei buca pusseivel de spindrar la cultura e la viarva romontscha senza il purtar de quella, senza nossa populaziun muntagnarda. Da quei

seresulta la relaziun denter cultura ed economia. Sch'ei reussescha buca de frenar la depopulaziun, vegnin nus era buca a puder mantener il romontsch el futur. Per quei motiv ha la Romania arranschau ina tschentada per ils exponents della Surselva. Quella ha giu in bien success ed nus sperein ch'ella animeschi las istanzas competentas de perseguitar vinavon quels problems vitals della Surselva. Ils referats teni a quella occasiun vegnan stampai ed edi en ina brochura speciala. Ils referents meretan in cordial engraziament per lur gronda lavur.

*Tschespet* ed *Ischi* ein buca cumpari igl onn vargau. Certas difficultads redacziunalas han caschunau tier l'ediziun dil *Tschespet* in retard d'entgins meins. Demai ch'igl *Ischi* en preparaziun ei ina ediziun giubilara, ha la redacziun de quel absorbau pli bia temps che usitau. Mo nus astgein sperar che omisdus cumparien proxima-mein.

Danovamein ei il *Regal de Nadal*, ina brochuratta per ils affons, vegnida edida. Plinavon ei era il referat «La situaziun economica en Surselva», tenius alla radunonza generala digl onn 1965, vegnius stampaus.

La gasetta dils students *Corv e Talina* ein cumparidas 4 gadas sut la capavla egida da Marcus Defuns ed Isidor Winzap. L'Ex-

*posiziun ambulonta* veta, cultura e lingua romontscha ha visitau cun success Claustra ed il marcau de S. Gagl.

A caschun della radunonza generala de S. Stiafen ha nies commember d'honor, scolast secundar Toni Halter referiu davart «*La Romania en vesta dalla scolaziun dils carschi*». Sias expectoraziuns concisas han anflau ina buna accoglientscha. La scolaziun dils carschi ei ina causa impurtonta, cun la quala la Romania vegn era a stuer s'occupar el futur.

Quella radunonza generala ha concludiu d'accordar la *libertad de scripziun* per ils organs ufficials e per tut las ediziuns della Romania. Cheutras spera la supprastonza de saver dismetter in crap de scarpetsch che ha caschunau bia malemperneivladads e gronda discordia alla Romania. Aschia ei la via per ina collaboraziun cun tut ils exponents della Surselva puspei aviarta.

Cun la fin digl onn 1966 ei il sutsignau sedecidius de remetter il presidi della Romania. El engrazia cordialmein a tuts gidonters e collaboraturs per il sutstegn ch'el ha obteniu duront quels 5 onns d'uffeci.

Cumpadials, atun 1967

Per la Romania  
Il president:

*Francestg Degonda*